

李烈鈞之言論

公誠書

九六實又相伯



上海图书馆藏书




A541 212 0016 6628B

協和先生注重天下為公以括學言即人各有  
其有吾人氏四萬之所有何在今天下之危幾  
不在有權勢者欲一人有一有一有乎而天下十  
六萬之人民苦矣我四萬之人民更苦矣

九六實相伯



民國廿四年夏



# 自序

余從事革命以身體孱弱學識淺陋未能言所欲言行所欲行故三十年來對國家貢獻無足語者然每當危難之際輒奮起以匹夫之責不可不盡也余晉京參預孫總理逝世十週年大典中山文化教育館成立二週年紀念及祝朱太夫人壽帛魯公之喪蓋扶疾往也兩年未至金馬門見峻宇彫墻益增荆棘銅駝之慮嘗思我國數千年歷史自有其精神勿論朝代盛

袁帝王賢否必有忠良爲之輔佐輿觀切諫昔猶有之民國肇  
造何獨不然 總理邈矣克強逝初英士仲愷松坡莫賡諸賢  
亦早逝賤恙日臻旦暮且去夫烏可靦腆於世耶骨梗在喉不  
吐不快狂夫之言聖人擇焉故在中山文化教育館有芻蕘之  
獻不禁大放厥辭議者以爲公開建議旣值大難當前又係闡  
揚遺教更應供之全黨告諸國人切磋琢磨用資策勵余無以  
辭然中心如噎矣因略檢國難期中文電附及之

## 李委員演說詞

## 隨從書記謹記

中華民國二十四年總理忌日中山文化教育館舉行二週年紀念會中央諸人九時謁靈後次第往集孫館長致開會詞黨部代表居正國民政府林主席行政院長汪兆銘教育部長王世杰該館監董吳稚暉李石曾等均次第致詞時遂至午聽者似疲呼禮人方欲宣告散會李委員烈鈞忽厲聲曰尙有人要說話立時就演說席云今日開會爲時甚久已有人緩緩的走了現在我又要說話未免討厭但我有個申明我的話不過五分鐘也不是放大砲請各位稍安心我要說的或爲諸友所想想說者也我本來是個不善說話的人但有時亦愛說我兩年以來臥病海上時常接得同志書勸我少說話靜心養病故年來遂遵同志之勸緘默寡言但又聞中央諸友意見甚盼各地同志有話到中央來說我今天既不易來到中央當然不能不遵

中央意旨來說幾句話我此次扶疾入京參預大典見黨中同志咸抱憂國之念努力於救國工作欲求得民族在國際上的自由平等實在是歡喜佩服但我想這件事實在是難得很若以譬喻來說則就是要起死人而肉白骨了這句話原來是春秋人的一個譬喻但現在非實在有此能力即不能救國這種世上所無的事也不是絕對做不到的不過庸醫辦不了一定要有個偉大蓋世的名醫乃能做到這非博士孫逸仙不可非總理復活不可我們大家固以信徒自居者亦曾研究三民主義與政策何以不能起死人而肉白骨而必云須先賢再世者何也以總理能做到的我們不能做到故也請申其說總理有大無畏精神而我們無有也總理這種精神隨時隨地皆有充分的表現總理若在北伐當然成功日本帝國主義決不敢若此橫行或亦不至若此無禮縱使事出意外總理必有方法應付必有毅力抵抗決不至陷於今日之危險而我們現在如何此其一總理有博愛精神而我們無

有也總理這種精神自大處言之要在國際上求自由平等並扶助被壓迫之弱小民族亦得到國際上之自由平等自小處言之必能使國內之法律與政治一律平等無疑而我們現在如何此其二總理有謙德而我們無有也總理這種謙德在民主主義敘言匡補闕遺更正條理屬望於同志數語已能看出而總理確守天下爲公之古訓萬事決於公論之誠意更無俟於言而我們又如何此其三嘗聞本黨同志演說云國家危險我們須努力挽救務使中華民族在國際上得到自由平等的地位慷慨激昂大聲疾呼能無欽佩但從未聞其方法如何請各位同志看看總理遺像下懸的遺囑明明指示吾人欲達到此目的必須喚起民衆及聯合世界上以平等待我之民族共同奮鬥我們現在喚起民衆乎聯合世界上以平等待我之民族乎共同奮鬥乎此其四總理精神謙德及所示辦法如此我們一點都學不到一樣都做不到國家何以不危險還來說什麼救國可恥可恥所以致此者以本黨同



志窮不失義個個都做得到達不離道沒有一個做得到此其故也故烈鈞以爲我們要想救國必須先學總理之精神與道德及切實遵行總理所示諸辦法乃克有濟雖然由中山而來至於今方十年耳去聖人之世若此其未遠也中山陵墓卽在紫金山高山尙可仰止近聖人之居若此其甚也然而無有乎爾則亦無有乎爾本黨同志知必有興起之者云云當季委員演說之始會場中頗引領故屢聞多數鼓掌聲迄說畢則衆議欣然似稱快者雖亦有不安者乃懷慚非反對也以此推之是國民黨人希望政治早上大道乃最大多數之心理使在黨中向負聲望或現膺要職而有才能者不易其初志與全黨人努力於實行主義及中山所授諸策略使全國人士智者克盡其能愚者克竭其力則國事又未始不可挽救也爰追記之

## 致中央電

南京中央執行委員會尊鑒電示誦悉數年以來鈞以民主政治難期實現益以多病之故未獲恆駐襄輔良用歉然昔孫子臆脚猶能乘牛車爲齊劃策破魏救韓鈞固體弱但日人橫暴若此合力禦侮焉敢不勉大計決定自當入京師克在和衆擊易舉本黨軍人之散居各地者想已分電遣使奉邀矣謹覆李烈鈞叩

## 致中央電

國事危殆亦云極矣救之之法昔曾陳述時至今日仍當積極圖之猶之父母有疾不能不用藥也自古聖賢固未有能起死人而肉白骨者今病雖已深苟未入膏肓治之非絕無望特須明病所在對症下藥耳目前危險固在敵人之強而根本病源則在人心已去非特不能信任政府恐轉外向他人也當國家危疑震撼之秋而執

掌大權及效命前敵者僅見少數之國民黨人多數人民未能發生其作用在敵國視之猶認爲民氣消沉斯豈盡人民之過哉爲今之計誠宜迅頒罪己之文廣開言路凡昔黨內外所建議其有裨於救國者迅採行之而負政治責任者尤應審度大勢早定方針一致奮起披肝瀝膽與國人相見赴湯蹈火與敵人周旋或能挽江河於日下耳目擊艱危如芒刺在背謹更盡其愚以當宗汝霖最後之哀呼也

廿二年，五月，十五日於南京。

## 致中央電

密前以察事嚴重曾屢電煥章先生詳告政府處事之難與相望之雅昨接東日覆電云台電敬悉弟揭幟抗戰原期對外犧牲瀚雪國恥旬日以來備感壓迫顧卒容忍者爲國難之嚴重實不願發生內戰以貽國家民族之羞刻政府軍隊到察省者十三師對同盟抗日軍愈迫愈緊平綏車昨已不通弟爲國家前途計爲民衆免除

內戰痛苦計決對汪蔣所提四事完全接受冀得諒解希公暨諸友與政府商之弟  
馮玉祥東辰等語謹此奉聞李鈞烈

廿二年，八月，四日。

## 致中央電

馮委員玉祥舉義張垣志在復失地雪國恥也烈鈞誠愚曾與王朱傅鄧諸委員密  
電陳詞請授大權俾當大任俚言淺見僅邀傳觀今玉祥傳檄收復察東並以血戰  
攻克多倫見告矣捷報到京欣慰可想昔張學良不戰而棄數省苟爲有罪也則馮  
玉祥一舉而復百萬方里已失之領土應爲有功國家紀綱有罪者誅有功者賞民  
主政制才智之士悉宜舉之此求有利於國非君主時代僅爲個人比也玉祥瑰傑  
英邁海內贊美今國事若此正求田單檀道濟恐不可得之時烈鈞愚慮以爲政府  
亟應明令授權示以方針共扶危局表中樞治國之誠慰國人求賢之望團結同志

安內攘外無逾於此苟不然者則天下後世其謂之何哉烈鈞備員中央恐政府誤陷於不道貽笑於友邦也故再進逆耳之言冀邀虛懷之聽至於龍逢比干之禍則非所敢避也

## 致中央書

烈鈞默然寂處不聞高賢之教久矣忽奉卅一電爲之神怡諸公主持中樞銳行先訓更制約法輝耀寰區共和模範黨人格焮然畢露令君主國人欽其卓越民主國人驚其獨步既羨處境益佩用心國利民福肇基於此蓋無疑矣以介公之英略坐臨五院兼攝三權原自有當循之軌固無用馬上治之法外求之亦無煩世之敬愛介公者苦費心機也粵東諸友同爲生死患難交今乃決然舍去良可慨喟然曷以致此則又不得不深長思矣元氣凋傷之後盜匪縱橫殘喘子遺惟執政能拯之

亦唯執政易於忽之則匡輔之者實有重大之責焉脊令在原兄弟急難居今日而言時局唯有痛定思痛力保和平徐商國是之一法明主不拒逆耳志士用敢批鱗鈞邇來衰弱無心問世但求不見太平天國之故劇得長隱以樂餘年於願遂矣謹貢區區唯諸公察之

## 致林主席電

林主席鈞鑒密并轉國防委員會均鑒留陳寸簡計邀尊察鈞本日抵并比晤百川諸友詳述中央碩畫皆爲欣然惟頗慮日人猖獗不已更盼中樞舉全國之力以抗之此間軍事已遵中央令實行甚勇厲也李烈鈞叩佳

## 致林主席電

10  
密在并與百川諸友詳談已明中央苦心出兵踴躍但糧糈無着各將領頗慮之前方各軍皆然并有斷炊者熱區貧瘠人烟稀少掠奪無從孫殿英與義勇各軍尤甚此實最大問題前聞子文兄報告作戰軍費曾籌足三月交漢卿分配豈欲復爲哈同耶望公在會議時特爲言之介公北上曾有電來煥章先生已晤面刻正詳談渠在此頗能維繫一方面之軍心他方面亦多有來請教者殆板蕩識忠臣耶謹先奉聞

### 致林主席國防委員會電

林主席并轉國防委員會均鑒昨電計已呈察北平來員所稱種種殊增民族之羞日人猖獗益甚本黨處此奚以爲計耶前呈提案未荷詳商此時束手待斃固咸知其不可卽枝節爲之亦實無濟於事必舉全國之力始克當此大難望諸公再審之

三晉民氣尙可用論其形勢進可協固平津駐可構成鎖鑰唯中央早示方針也擬  
眞赴大同轉張垣與煥章討論鞏固察區之策上計未見用只好求其次耳

## 致林主席電

熱河不守察冀形勢緊張敬之電商此間遣兩師於大同諸友均甚振奮唯若何能  
使士飽馬騰望中央速爲籌之

## 致林主席國防委員會電

林主席并轉國防委員會均鑒友人自熱河來備道其詳此次失利固由軍不能戰  
亦兼民心向敵此頻年惡劣政治有以使之昔年政府不能助蒙自治而反令徐樹  
錚率兵征之其結果亦如是也政治之優劣影響於民心者至鉅日前政治會討論



熱河自治建設案猶極審慎今欲予之不可得矣日軍此番侵犯各國卽謀制止已有鞭長莫及之勢恐某國不能無默視之嫌我國外交當有注意方向而內政之改革開放政權使人民欣然奮起愈未可緩矣昔申包胥乞秦庭以解楚難鈞今亦向諸公痛哭也

## 致蔣委員長皓電

南昌蔣委員長尊鑒前奉覆電具見江海下百川之雅度彌用欽遲烈鈞奉中央電召於昨日到京候開國防委員會列席承教聞節鉞蒞漢後匪勢大殺民用又安殊神往焉李烈鈞叩皓

## 致蔣委員長儉電

密岳軍兄過京詢悉種切盛情謙德倭愧無以報之北平確訊東北軍見敵卽跑一潰數百里朱梓喬有勇無責張輔臣遲遲不行華北形勢似頗可慮烈鈞列席會議數次已略盡言責現擬與允忱沐波芷青諸友往遊太原促遵碩劃先救熱河兼候使命一俟我公移節再詣謁也

## 致蔣委員長江電

密冬申電拜悉鈞此次遵召入都原定先詣贛謁公聆教兼陳鄙懷而覆示謙冲並囑緩行遂未造次微忱嚮往仍未已也抑以今日救國禦侮首在能善用憤慨之心與龐厚之民力唯公能決之迭奉尊電微特謙德可挹而誠懇之雅令人景仰難置唯此次北行固欲遙輔我公冀振軍民之氣用固河朔之防然團結袍澤相與俱來共策大計實亦至要公言及此固鈞所當勉爲者也第北方雖多舊好或易宣傳盛德以鈞綿薄恐未必易入人深心也今夕北行相距旌麾漸遠甚冀公時有以示之

## 致蔣委員長陽電

密啓程前奉覆江西電備陳種切計荷察及車中三日夜始抵太原當與百公及諸

友歡然道故密告一切咸表佩慰雖日人野心未已恐更猖獗有公領導挽救無難三晉夙稱禮義之邦古風猶存此時諸友皆努力於屯墾及內部建設循序漸進必有可觀惟對國難憤慨同深決秉中央主旨協全力以與日抗也

### 致蔣委員長震電

真電奉悉密烈鈞蒸日抵張晤煥公詳述政府決心并政治漸入憲政之途及政府殷勤盼望之意煥公出示尊函極表佩慰唯據烈鈞觀察煥公唯一志願在抗日破敵渠在此頗能維繫一方面之軍心而他方亦多有遣使聆教者煥公皆以以死報國勉之前線作戰遂呈奮發今若驟離或亦影響於士氣久擬入京遲遲未行者職是故也然煥公亦不欲久居於此將來行動仍必尊重中央與諸友之意鈞刻正爲詳談卽詣轅陳報也

## 致蔣委員長錫電

密頃呈震電計邀洞察鈞復與煥公慷慨論古今事並力請其先與我公晤商大計煥公慨然曰國事至此豈一人一黨應負其辜全國人民實共有其責余與介石交本厚今日之事祥甚願尊崇介石之意而襄輔之矧其所注意者能在抗日乎暢談良久極爲圓滿鈞准明日啟程蒞詣報命得公坦懷相與天下事未始不可挽救也

## 致蔣委員長書

廿二年五月十三日

密時事新報載大學教授通電一節謹剪寄覽以覘人心曩觀宋史深感徽欽不能用宗澤李綱之言收復三鎮演成南渡之局迨人心離散大勢既去岳鵬舉奮起江淮文宋瑞應詔勤王事已遲矣况有秦檜汪伯彥黃潛善外通敵國內沮忠良乎現

全國已呈渙漫之象而敵遠勝金元甚可慮也鈞以鎮江房屋不宜避暑故留京尙未去耳

## 致蔣委員長江電

密東電誦悉愚者之慮自當詳陳此入京本旨爲公所亮察者也今日國事敗壞外侮侵凌有如公言實已陷於覆亡狀態驚心動魄亟宜拯之而其法首在挽回人心用其智能增其信仰根本之圖積極改革猶虞已晚自中常會決議案發表後人民認政府有公開政權意向而未認有此誠心以事實無表現各地黨政機關嚴厲取締一如昔時故也此層苟不先予解放但見江河日下耳而能解放之者又不在他人聞善則拜聞過則喜自昔尙之開放自由黨中猶有懷疑者實不足慮雖臨全代會爲期伊邇唯此短期間爲最有價值允宜重視者也上海爲輿論中心各省民衆

之原動力悉萃於此鈞接近之日較多而公能聞其言論之時甚少此鈞所以屢爲  
瀆陳者顧今日救國事業成敗繫公一身公之威望殆普及全國而信仰尙待普及  
全民是則疊電所陳或卽能收茲宏效又意中事也鈞以血壓高多日未出席謹更  
竭其愚用答明問得國在危得民在擾斯其時矣

### 致蔣委員長儉電

廿二年五月廿八日

有電奉悉蓋籌所示遠逾尋常鈞之漾電初僅就輿情方面斟酌而言因政府雖有  
公開政權誠心事實上尙未表現社會方面不免切盼先獲得最低限度之自由故  
不厭羅舉以備參酌公從實際鑒別自當權衡審慎擇利而行顧問委員會原非根  
本政策難贖國人誠如公慮鈞亦不過以事急情迫欲於過渡期間冀其足以增加  
政府作用及力量而已國難加重離心力亦益增政府誠宜時時漲大其吸力所謂

勢順宜求正助勢逆宜多得旁助也華北局面能改善組織多加能者應能維繫人心任其直接以當衝要亦計之善者

### 致蔣委員長支電

二十二年六月四日

密停戰協定簽字政府雖具苦心而議者攻之益甚輿論方面勿論矣且有別圖建立者雖其事未必有成而其謀則已漸著日人侵略靡所底止煥章起於張垣對政府應變不免微詞其抗日之心實爲堅決故國人多稱頌之鈞以與渠有素久疏音訊刻乃去電冀其專力禦侮以盡公誼兼報私交昔宋文帝以收檀道濟而危國齊桓公用管夷吾以興邦古人治國得失固有足爲借鑑者鈞以頻年跋涉襄輔無功將再歸匡廬養疴修學相距旌麾漸近矣

### 致蔣委員長寒電

二十二年六月十四日



密住日到滬留此中委及知名之士多已接談彼等只認政府措置之非而未諒政府處事之難詳察諸人言論尙非徒爲責備之嚴蓋數年以來政府設施實未能以慰民望也此時苟冀團結內部稍減人民之非難有急宜辨者二事一嚴令軍政各機關不得任意逮捕人民祕密處置亦不得濫用軍法其二是非得矢公開辯論取消文電檢查修改民衆運動組織法切實保障言論出版諸自由苟能如此庶其餘重要問題有進行交換意見之可能如其不然則政府所盼望於黨人國人者徒見治絲益棼日暮途遠而已猶憶日前中常會開會時某友厲聲曰中國領土雖大無一處能表現主義者卽中央黨部亦非三民主義所在地蓋外來文電雖中委亦不得見違言討論某友之詞慷慨悲憤聞者默然中央諸人早呈散漫狀態而微詞怨語則隨處可聞此誠不能不加以警惕者也若此情形皆公不易獲聞者鈞則願公聞之也粵桂閩謀另組政府之議頗盛如何演進在京而不在粵煥章舉動不盡如

報載所傳然日人已甚爲異之擇要以聞維冀諒察

## 致蔣委員長豪電

二十二年八月四日

密前奉覆示逆耳之言乃蒙採納斯固進言者之幸也數月以來亦嘗避世於金馬門貢其愚慮矣責人斯無難究有從善如登從惡如崩之感還滬後涉獵藏書風雲溟海遂少聞問故公處亦無書報也近日國內形勢漸呈穩定惟煥章舉義抗日與政府所採方針不免出入斯固由於一般愛國之士對政府苦衷未能諒解而煥章熱情救國事尙可佩其對政治之不滿情亦可原政府此時似宜亟采兩全之策保持外交方針並使煥章才略得以爲國宣勞以收勢合則治之效而免勢分則亂之憂公主持樞府與煥章夙交復厚信能策於萬全也鈞久擬登山道暑兼候起居尙未果行屢獻芻蕘殊愧無補高深耳

## 致蔣委員長敬電

二十二年七月二十四日

密養電敬悉日前曾派員赴張垣調查商洽昨接來電謂該處情形非盡如外間所傳煥章先生平昔主張和平團結一致對外之旨始終未渝甚盼早日赴張完備前時工作等語是運用之方猶有冀也此次收復察東勿論其方法若何均與國家有益鈞不敢謂煥章對公絕無責望卽有責望得其道而處之何難使之誠悅是在豁達大度不事馬上治之現海內以政治不平之故鼎沸久矣廬舍蕩然流離載道少壯苦征戍老弱疲轉輸強鄰偪處乘隙來侵國事至此能無憂慮耶鈞愚以爲此時努力在全國而明察在公一人公能坦懷相處兼重繩墨則治平之世未始不可期也現擬致電煥章詳告政府苦衷當能諒解而行止則須視公之本意何如也

## 致蔣委員長儉電

二十二年七月二十八日

急沁電敬悉密尊示辦法四項第三第四兩項尙待蓋慮耶第二項所示防邊計劃自應遵守軍會主旨既荷不爲已甚煥章宜能深體國家艱危與公之雅意茲鈞欲有陳者在第一項此項尊示辦法尙何有異議可言惟察省今當強敵之衝板蕩至此或爲選將之時是否卽以該方重任仍責成煥章使其前被推戴於人民者今後聽命於政府如政府能先授命則取銷原有名目更屬當然事亦易爲苟令先行取消則政府是否仍能倚重煥章以作長城鈞甚欲先明斯旨得公推誠相與者料煥章必能竭誠相應也政府授煥章以實權雖拜命與否不可知然煥章進退已自如政府統一全局之願益遂矣遠承電問再貢其愚惟明察焉

### 致蔣委員長豪電

二十二年八月四日

江電敬悉密頃陳支電轉報煥章東電計邀察及煥章處世公知之較詳其語言雖

涉激烈愛國尙出精誠國危若此實亦不容坐視時也今仍以收復察東之故受政  
府軍重大壓迫使他人當此者易地而觀恐更不知何似矣煥章東電所表示似猶  
欲謀誠意感應者顧今日之事能否善用其謀求大局安定表政府大度示國人信  
實在公而不在煥章也承公采納愚慮擬轉中央並使不落痕跡彼此顧全宏量謙  
冲事誠善矣煥章世電間或失實但第一步既已完成第二步即可商洽鈞前未敢  
云來山謁教又未敢云赴張達意者以未諳究竟也今公既諒煥章之處境煥章又  
重公之所言是兩賢契好有期大局奠安可望則爲國馳驅鈞又何敢憚其勞瘁耶  
謹肅電復仍候續示

### 致蔣委員長陽電

二十二年八月七日

密疊電計達所以屢爲言者以前途遼遠欲公等略復夙好耳而事則在公也

# 致蔣委員長世電

二十二年八月三十一日

密匡廬聞教得慰微忱臨別上言欣承垂聽因益知公之憂國固與民同而賢勞則駕群賢之上矣鈞感日抵滬當地知交咸來問山中事遂詳與言今人民之希望於政府者皆政府所應急起施爲者也日本醉心侵略猶復銳意革興最近閣議除外交國防財政諸端有新決定外其第四項則爲改良政治組織而以地方分權辦事敏捷爲原則擴大自治團體之組織發展人民智能等根本大計以日本君主國家猶能若此虎視東方能無危懼而迅圖奮起耶前聞公言注重開放黨禁實現民治故述及之亦欲公以強敵爲借鑑耳鈞以舍間有事暫不離滬然於公固深仰望焉

## 致蔣委員長敬電

二十二年十一月二十四日

匡山聞教暑往寒來又逾數月政躬綏和度符遠頌俚言淺識自昔見重已難故久

未以書報現閩疆又以獨立見告矣雖其事結果未可知然南京設施實鮮能適合國體洽人民公意也本黨馬上定天下必欲於馬上治之天下人豈能盡戮耶鈞深懼國之危而感公之雅故不能無責言亦不能無盼望斯時救濟之法仍以迅速解放人民言論出版集會結社諸束縛使在法律政治上受平等待遇斯實爲集智聚能安內攘外之根本要着卽國民黨本身亦不必迫之使離強之使合此公疇昔所贊同者今實行益未可緩矣否則天下紛紛何時定耶閩事醞釀伊始和平解決宜有其路是在能善決策焉肅貢數言惟公共圖之

### 致蔣委員長覃電

二十三年四月十三日

密久臥病榻遂疎音問亦未能問聞國事也報載通車通郵又將實現斯時對外誠爲難事然撐持大局本賴全國民大會會期既經決定猶不能解放人民言論出

版集會結社諸束縛遂致民族力量無由表現本黨政策何異盡走死路而放棄生路也人心盡失矣使人責以註誤天下奚詞以解賢者不悲其身之死而憂其國之衰鈞雖至愚竊欽古訓蓋今日國家大權名雖分掌實則係公賤恙已陷難治不敢貪升斗之俸故再爲公一申至計也倚榻陳詞明察是幸

### 致蔣委員長書

三中全会時承電問疾并約赴會隆情謙德至爲感佩曾專函奉覆并敘鄙懷計荷譽及大會閉幕後京滬盛傳雅度影響所及昔之以公爲非者已不似前此之甚而昔之以公爲是者更增其崇仰矣實行民主政治實立國必循坦途公既能誠意領導衆望自集何慮內憂不息外侮難平是在銳意圖之今日爲雲南首義紀念追想當年賢達參預軍政重要而又年在五十以上者唯鈞一人苟延於世耳韶華如過



隙殊增慨焉聞公蒞滬謹以書問

## 致蔣委員長書

奉覆示極佩謙冲公拯贛鈞贛人自應勉爲助顧公完成北伐功在國家國人均渴望本黨能實行總理遺訓共致富強乃自十五年迄于今茲內亂外侮均予人民以極慘之痛苦而人民于應有權利從未享受民選大典遂付缺如此美國大選國民狂熱慶幸蓋人民在民主政治之下不受何種壓迫得自由參政也吾國雖與美國同號共和而相懸若是豈果無羅斯福其人乎論世界英雄者恆推重基馬爾與墨索里尼二氏功業固可欽然不若美法各大政黨首領之足則倣也今我國憂患相乘危險極矣救亡圖存首在實現全民政治集天下智能以治天下三全會開會在邇公領中樞萬方瞻仰誠能循此大道與民更始則黨中同志孰不欽崇安內攘外之功何難立就國人愛戴更不在歐美諸賢下矣

## 致馮煥章先生電

二十二年六月四日

煥章先生尊鑒密入京後以言難見用責有專歸未作積極主張亦未出席會議之善可告遂疏音問接子良轉電知公舉大事於張垣日寇侵凌國人共憤公應袍澤之望本堅決抗日之心起而圖存九四老人國學泰斗既代人民勗賀矣中央諸人讚美者多冷視者百之一焉弟以跋履頻年鮮補於國無輔於公慚於建議然深信公之雄邁足以鎖鑰北門板蕩識忠臣政府此時亦必能鑒於南北朝往事而自重其萬里長城也握別數月公精神必如昔勢順成事勢逆成名公誠偉矣將有匡廬之行特致數言爲賀弟李烈鈞叩

## 致馮煥章先生電

離京日久音敬復疎不審中央政情何如尊狀又奚似惟據弟所知者政府對公唯一希望是來中央人民對公唯一希望則在救國今公尙未接受政府之意而先已快人民之心不貪高官不惜性命惟仁是求惟義是赴旬日間傳檄收復四縣今且血戰攻克多倫舉百萬方里已失之領土首收復之捷報飛傳聞者雀躍公等之業誠偉矣惟昔人不戰而棄數省以立功今公一戰而收察東恐難免於罪緣政府希望於公者并不在此且不需此也今爲公計宜速偕諸將帥肉袒負荊詣京請罪并申明今後不預抗日禦侮之事則功逾陳湯罪逃武穆豈不善哉雖然發揚蹈厲英邁如公者乃進若是之言固知公笑其愚弟亦深知公之爲公者必有更進之偉舉爲民族光也謹爲賀

## 致馮煥章先生電

弟以南中情形未明立奧故屢承電詢尙未奉答現時勢處此苟行之有疑則追之難及故略陳如另電望公察納政府軍此時係開弓彼苟畏輿論必不敢放箭也

### 覆馮煥章先生電

七月十四日

文電誦悉鷓鴣翱翔麟鳳潛伏人不戰而失四省爲有功公傳檄收復察東爲有罪斯千古奇聞然公亦何以令人畏罪若此則公更爲千古奇人矣弟等自當聯合諸人再申正論爲歷史略存正氣也

### 致馮煥章先生電

公真電發出後同情者益稱頌反對者詞亦塞政府既不使張抗日旗幟宜有妥善辦法與公商權國防會曾推鈞赴粵刻正力辭有機北來固所願也

## 致馮煥章先生電

有電敬悉密南中情形公必瞭然兩月來公之偉業已深入人腦救國忠誠亦大白於天下今後審度大勢易定方針牯嶺來兩電商事弟已將鄙見詳爲陳之俟更得覆電看何如也謹覆 一十二年七月二十八日

## 察哈爾抗日實錄題序

是書痛史也憶十四年春余隨

中山北上籌策國事不幸

總理上賓諸友乃相約分馳各地謀大舉余遂走張垣識煥章馮公公瑰傑宏放並世寡儔治軍嚴整出時下諸帥上然其好學不倦則尠有知者馬廠首義承德旋師

固大有造於國家迨北伐軍東出復率宿將徇秦豫略燕冀全局以定二十年日軍入寇舉國震動中樞束手公義憤不可遏請纓未獲於邑如泰山旋赴張垣適日軍更犯熱河東北軍望風卻走中央軍晉軍西退不戰棄地國人呼號卒無濟形勢危急未有甚於斯時者公懼國之亡念民氣可用奮起禦侮愛國之士遐邇從之倚公若長城舊將義軍咸集麾下於張垣開軍民大會共決大計國人響風士氣益振收潰亂之衆成節制之師遂克察東諸郡暨多倫重鎮日軍落胆舉國歡騰公之業誠偉矣方期戮力長征盡復失地雪恥報國乃未幾以塘沽協定聞政府更派大軍十三師薄宣化天下訝然而公則處之坦然乃通電解兵與愛國軍民別矣自是國內遂無復有舉抗日之旗者

## 致馬湘伯諸公電

上海陶星翁煩轉馬湘伯章太炎孫伯蘭黃膺白楮慧僧張鎔西諸先生道鑒晤教後卽入京言責既盡遂遊晉察故人情誼所見頗同又復來保仍本前旨惟說力既不足而行動乃如春秋衡士今日之事論者或云和戰兩難其實能舉全國之力應此大難戰固可能和亦不屈則開放政權革新政治實最坦途現仍力主此旨以救國介公意頗謂然革命數十年如愚見幾成孤調不知當時革命究爲何事也謹電奉聞祈時賜教李烈鈞叩

## 致汪精衛先生電

刪午電敬悉密日本侵略自戶水寬人桂太郎山縣友朋大隈伯諸人主其謀而田中若槻犬養覬覦其事今事縱了後患仍多則中國今後之設施要以捍禦東鄰侵

略爲唯一要務是應斷定者欲求舉國一致之禦外當先求內亂之不起惟政治平等速行民權入於憲政足以內安人心使之能者盡能智者竭智公固夙主實行民主政治者北平主政時期曾有無國無議會之偉論現在人民希望之迫切與時勢同其緊張而本黨諸賢則所見偶異公誠俯念國事多艱人民望治毅然實行民主政治則全國謳歌難關打破皆是坦途矣

## 致閻百川先生電

太原閻百川先生勛鑒外患緊迫抗戰勢所必然中央以國防委員會事相召弟已於前夕入京藉貢愚誠冀有佐助盱衡全局知燕營幽并緊相唇齒扼要運籌實爲後衛之區爲國爲晉知公早有綢繆固邊驅寇夙願一爲公助今當大難擬卽來并一傾廿年契闊也弟李烈鈞叩



## 致閻百川先生電

密南中情形芷青想有詳報弟以言難見用而軍國諸事又責有專歸故未積極主張亦以國危至此非明玉碎瓦全之辨實亦未易挽救也停戰協定簽字輿情憤慨政府無能實有以招之日人侵略難測將來長城範圍何爲界說煥章激於義憤蹶起張垣鎖鑰北門國人稱頌中央諸人讚美者多冷視者百之一焉誠以宋文帝之自壞萬里長城國以危殆前事可鑒末可輕爲疑慮也晉爲華北之樞與察平津以共存知必能輔車爲用並使各方將帥始終以致力禦外爲專務也弟旬日外赴匡廬春間造謁未詣河邊登五台時神往焉

## 致太原諸友電

此番觀光表裏山河豁然胸臆欽感無已鈞與百公闊別三十年今始獲晤教於驚

濤駭浪之時雖鬚髮間白而神采奕奕一如疇昔快慰何如三晉人民熙熙皞皞如樂堯天惜人民雖獲安居尙缺活潑自由踴躍向前之銳氣啟行時曾與百公言之願諸公深籌更進從保障民權發揚自治作精神之鼓勵不特自固根本亦收拾衆望奮起有爲之善法也百公與海內英賢共建民國自有其長遠之歷史愚以爲時正可爲未宜緘默應言則言想諸公當有同情也

## 致太原諸友書

到保已數日此行主旨在求開放政權使國人智能得爲國用以拯危局并擬具辦法連日晤談頗荷贊同介公并言去歲以來卽有此意當共圖之現介公已派馬伯援赴張垣迎煥章擬俟其來更爲陳說倘得百公遠歌同調與介公等聯銜提出於中央必能濟事前方戰事尙在相持敵擅飛機利器我恃民族精神接戰旬日傷亡

相埒據平保觀察有謂敵佔要隘後將暫停者有謂轉犯察綏者介公現取鞏固戰線徐圖恢復之策果日人暫止東侵轉圖西犯則察綏烽警先勞百公宜亟有以杜其謀也臨書神馳維照不一

### 致黃膺白先生電

黃委員長勛鑒密修直叔雍兩兄南返得謠道躬綏和政情孚洽遠懷彌慰弟以政治主張又生波折民治難期遂不欲問聞他事而獨於察事未能忍懷以公主政華北與煥章皆至好也當煥章舉事之初弟與諸友會會電中央請授大權使當大任政府雖采和平辦法而與人民所希冀者相懸殊連日報章且紀派兵徧察之事斯豈公與敬之兄之本意哉昔年某君放走鮑羅庭於鄂而電煥章捕之於豫煥章語其左右曰玉祥雖愚不爲黃祖現煥章且爲彌衡矣而爲孟德者爲何人爲黃祖者

又將爲何人耶煥章對政治不滿與吾人殆相同然其舉動則在抗日救國公必能體會而維繫之也現擬專電煥章勸其念政府苦衷尊公等雅意共商救亡圖存之法並專員詣說務底於成亦望我公此時特爲虛懷相處且俟下走斡旋也臨電神馳欲言難盡弟烈鈞叩

### 致居覺生先生書

覺生先生道鑒寇仇深入日蹙百里恐三鎮亦危而人心日去內部離散尤爲可憂弟頃致中央一電特先檢呈知公能挽國事於垂危也病稍愈再詣謁在此如坐荊棘耳

### 致汪精衛先生書

精衛先生道鑒弟以血壓高多日未能出席亦未能詣謁聞教藉陳鄙懷星期六之

宴稍愈當奉陪昨日曾陳中央一電略盡其愚淵博如公知必有所採擇矣

### 致孫哲生先生書

哲生吾兄左右不晤教又多日吾人主張未能實現而國事日危人心盡去奈何弟  
昨曾陳中央一電甚盼公本曩日精神爲有力主張促衆人采納論譎訛訛亦孔之  
哀或不至見於今日也

### 致經子淵先生書

子淵先生左右前日聞教欣識黨中猶有瓌傑宏放如公者弟在此未能襄輔徒增  
慚慙行邁靡靡中心如醉昨日遂致中央一電特先檢呈望公作有力之主張救茲  
危局介公處弟亦常有電去痛切言之

## 致葉楚傖先生書

楚傖先生勛鑒違教數日矣弟息養後湖仍未見愈而目擊艱危如芒刺背昨日遂陳中央一電作宗汝霖之哀呼此電外埠已由國府拍出本京各院長委員處請公囑祕書處分致爲荷

## 致胡展堂先生問疾電

違教數年未瞻雅範林泉息養音敬遂疏報載尊恙血壓頗高彌懸景念鈞向患此病因能靜養未頻於危願公善攝不必溯及南渡君相也



柏烈武屬書

潯淮鼙鼓憶當年漢水滔滔勢拍天擊楫枕戈同夙抱也曾携手奠中原

修江舟中

十八年夏

春光迤邐滿芳洲道出寧江望永修天地有心恆覆載湖山無恙任遨遊風敲岸竹  
疑琴韻暉映林花似錦裘更喜高人同擊楫悠然箕踞一扁舟

過金陵舟中晚眺

十九年夏

日落星稀夜尙明輕風淡蕩送行旌歸舟欲破江心月宿鳥驚聞弦外音太息故園  
多鶴唳懶從滄海看龍爭閱牆畢竟緣何事孰挽銀河洗甲兵

謁譚畏公墓

二十年

拭涕瞻遺像登堂益悄然流風懷逝者落月照當年前路疑猶迥斯人信可傳吾將  
浮海去那得夢黃泉



與馮煥章同登泰山 廿一年夏

携手登岱巔一覽天下小自古無賢愚都爲名利擾  
遙望中山陵企懷勞我心精靈應永在曷以慰蒼黔  
日出照千山層巒霄漢間陰霾渾不礙蒼冥自啟關  
人醉我獨醒卜居絕人境今古豈易情名山聊息影

聞馮煥章辭饋

恥食周家粟逸民安可辱此處非首陽高賢欣寄足

別馮煥章 二十一年夏

并力扶危志待伸抗懷天地亦艱辛匡廬歸去東山遠五老峯頭望故人

爲馮煥章題陳樹人畫松

流水高山一脈通浮雲蔽日古今同歲寒總自知奇節應有芬芳共始終

吳門赴李印泉金松岑諸友宴

吳門風景柳彭彭况有名賢聚此間便欲移家到江國春來放棹看青山

雲南首義紀念日

二十一年

金碧馳驅憶昔年滇黔繫鼓上雲天義聲遠播幽燕動那得劉唐再戍邊

湖口訪楊咽冰同遊石鐘山

二十一年秋

偕遊名勝訪名賢底事旌旗耀眼前自媿平生虛跋履敢勞相逐大江邊  
一代鄉賢六一翁高文直節兩堪風山中別有陶元亮青史人材四顧空  
頻年未遂澄清志此日猶爲汗漫遊同倚高樓一長嘯不堪洪水尙橫流  
昔日何人敲此石鐘聲直透九重天遐邇知音曾豹變未應又作睡獅眠  
世態翻雲還覆雨長河激濁復揚清狂濤滾滾終歸海醉向鐙前話治平

題一禪廬山畫集

西六  
高人息影匡廬久識得匡廬面目真寫出匡廬無限意匡廬從此屬斯人

至南京 二十二年春

滿眼煙雲罩四空熙來攘往自西東何如直北驅強寇策馬陰山大雪中

太原訪閻百川

鄭風歌罷賦唐風三晉雲山一望中遍地黃金同土價那應成敗論英雄

過雁門關

朔風蕭瑟送斜暉點點征塵上客衣駐馬關前一回首春來幾見雁南歸

張垣訪馮煥章

關山迢遞戰雲搏鼙鼓聲中小駐驂萬里馳驅問知己爲安河朔與江南

集廬山萬松林分韻得韻字

匡山富巖壑松嶺有嘉聞森森萬木陰潛虬睡深穩涼風發羣籟萬濤振天韻聞胸

獲清賞浩氣如龍奮吐納流雲霧汎掃出蒼潤衆峯忽豁舒挺秀爭雄駿相對各驩  
然共盡杯中醞

過小孤山

螺嶼嵌空翠色鮮波濤鐘鼓上雲天羨他漁父能忘世白日江湖醉酒眠

黃海舟中

二十三年夏

四望茫無際狂濤滾滾來盲人操巨艦猶自逞雄才  
寐覺無虞晚唯艱共濟心前程應未遠微聞海鶴音

黃海舟中夜坐

二十四年春

天上星河沒海上波濤歇孤劍嘯孤舟采薇與采蕨

上海图书馆藏书



A541 212 0016 6628B

四八

~~D7130~~

許公  
克誠  
藏書

~~D7020~~